

加贈高陽郡公耿再成泗國公子瑜威州衛指揮僉事

己巳山東濟寧蝗命有司捕之

是月故元將也速犯慶陽官軍擊卻之

盜陷安溪縣泉州衛兵討平之

曲先衛指揮沙刺殺故元安定王卜烟帖木兒安定王子板

咱失里殺沙刺尋亦被殺

五月戊寅朔廢獲嘉確山鎮平考城柘城新繁雙流金堂崇寧

德陽并研資陽什邡彰明濠陽營山儀隴西充渠江慶符筠

連珙昭化蒼谿南部江油青神威遠大邑彭山丹稜中江蓬

溪射洪名山武隆新寧豐都南川隨縣應山歷城孝感光化

棗陽上津竹山枝江益陽善化長沙當陽沅江通道新城定

陶昌化交河滿城祁縣東明永淳等縣俱糧少併入之改孟

睢綿彭房濰賀雄容藤橫等州為縣


畿內江南浙江糧長一萬石以上者增副糧長一人

甲申置安徽宿州守禦千戶所

乙酉蘇州知府江寧王興宗為河南布政使司河南布政使

徐賁降為懷慶知府

丙戌高麗國世子王禡入貢卻之



丁亥靖海侯吳禎督浙江諸衛舟師仍從海運遼東

許邊民團結防

戊子戶部尚書周斌改刑部禮部尚書呂本工部尚書李敏

為兩浙福建都轉鹽運使司刑部尚書秦中商嵩降刑部郎

中侍郎高萬傑降部員外郎

曹國公李反忠往鳳陽視兵

壬辰陽曲縣地震陝西華亭縣大雨雹傷稼

減秦州茶馬司令丞各一

遣監御史王淵等六人分巡各承宣布政使司

乙未裁綏德州

登州衛拓新城命侯農隙

丁酉戶部尚書僕斯為山西右叅政侍郎沈立本為尚書

已亥置東宮通事司令丞各一


庚子命太師韓國公李善長曹國公李文忠共議軍國重事

辛丑征西將軍鄧愈至吐蕃敗川藏之衆追至崑崙山斬獲甚衆

丙午復各布政司寶泉局

誅戶部主事趙乾以賑荆蠻等水災朕寢食不安乾稽賑坐

視民死不在念



是月山東臨淄縣丞王基乞發山海寶藏及禁職官言事

上召責而斥之

有內侍以久事內廷泛言及朝政即日斥還鄉終身不齒諭

中書省臣曰闈人借小善小信固結君心而便辟專忍其本

態也苟一為之感將不可遏抑矣朕決去之以懲來者

河間旱永州大水命賑之

番酋也速脫火赤等寇涼州肆掠指揮鄭遇春擊卻之

六月丁未朔延安侯唐勝宗城頴上

辛亥夜有大赤星自天紀流至天市西垣没

癸丑江夏侯周德興往濟寧宜春侯黃彬往沂州理軍務

乙卯定各道按察使及各府州縣并首領官資格

丁巳令天下臣民言事得實封直達御前

庚申裁磨勘司


進階文二縣為州改兩當縣曰徽縣裁廣宗縣

壬戌召征西將軍鄧愈班師還京

丙寅命中外政事先啟皇太子然後奏聞

永平大水

丁卯廢褒城沔洋漢陽平利縣



甲戌山西長子縣稅課局大使康有字上三事曰重學校曰  
褒良忠曰文武並用上嘉納之

是月遣韓國公李善長魏國公徐達等十八人分祀岳鎮海瀆

七月戊寅夜歲星犯亢

庚辰儒士趙普為東宮文學

辛巳夜有赤星自漸臺流至天市垣没

甲申置通政使司陝西叅政曾秉正新受命未赴拜通政使

應天府尹劉仁為左通政使

改承勅書監令丞為郎

刑部尚書周斌為陝西布政使左叅政大都督府經歷尹性  
為刑部尚書


置四川叙南府

乙酉普定女知府適貴來朝

殺山東按察副使浦江張孟兼孟兼負才氣輕布政司吳印  
印故僧也印訴上即治所答之孟兼捕書奏者印復訴

上逮至京師尋棄帝詔印曰除爾害矣

方孝孺曰張孟兼中實無憚賊之心祇以生平尚氣好高  
人以故為人所陷害才能者人所欲得也苟無謙以處之



而挾以驕人其為身害奚怪哉

丁亥國子助教胡隆成為齊府長史

戊子劉璉為國子監丞誠意伯劉基之次子

戊戌初昏歲星犯亢

壬寅給中外諸司散官

乙巳劉仁仍為應天府尹

是月遣監御史巡按各郡縣

北平諸郡俱大水

浚巴國王佛喝思羅入京上表貢方物

湖廣都指揮使周賢卒

八月戊申命行人李子南祭南昌康郎山兩廟苑事諸臣

庚戌屋負邱為大祀殿將合祭焉太師韓國公李善長董其役

辛亥置寶泉司

壬子夜太陰犯心


癸丑選各武臣子弟入國子學讀書

改建社稷于闕右亦合祭

丁三佛齊國王但麻沙那阿者卒子麻阿者巫里立入貢請封

丙寅熒惑犯天罇星

國權 洪武十年



壬申定百官儀從

是月陝西平涼府隕霜殺稼

九月丙子朔免浙西被水各縣今年田租

戊寅 上謂侍臣曰荒君怠主莫不藉口無為孰知無逸乃

逸否則帝舜何曰倦勤大禹何曰惜陰文王何曰不遑食朕

未旦臨朝晡後還宮夜每披衣數起仰觀天象一星偶有

失次即為憂惕量度民事次第筆記待旦發遣非不欲暫安

惟祇畏天命恐群臣以天下無事便欲佚樂股肱旣情元首

叢脞故言及此

乙酉暹羅斛國王遣子昭祿群膺入貢命禮部員外郎王恒

賚詔印封叅烈寶昆牙思哩哆囉祿為王

四川成都地震

丙戌占城國王入貢

辛卯夜太陰犯昴

癸巳浙江布政使右叅政茹太素省視

丙申賑浙江紹興金華衢州等府水災


辛丑右丞相胡維庸為左丞相左御史大夫汪廣洋為右丞

相右御史大夫陳寧為左御史大夫右丞丁玉為右御史大

國權

洪武十年

十



是月分教北方監生俱召還錄用

十月丙午朔社稷壇成行奉安禮升上祀奉 仁祖淳皇帝配

壬子觀心亭成致仕翰林學士承旨宋濂來朝召諭之曰朕

廟社日致齋于此卿其記之傳示來裔知弗懈愈虔

夜太白犯進賢星

乙卯熒惑犯輿鬼

丙辰勅中書省曰熒惑占云主冢宰凶貴人下獄死不爾則

大災上帝好生故愛德人而象之爾諸大臣知改愆省過焉

復令河州嚴備

良家子弟充驍騎舍人者悉放還

永平火賑災民米布

戊午封大都督同知沐英為西平侯祿二千五百石

辛酉賜文武百官公田充祿俸


甲戌勅封麻那者巫里為三佛齊國王賜駝紐銀印

是月大內宮殿告成

十一月乙亥朔 上以大內宮殿不侈謂諸侍臣曰朕惟夙夜

慮驕盈凡有興作量度再三不獲已乃為之亦未嘗敢侈皇

后宮中亦能儉以率下躬服浣濯皆非驕飾實恐傷民財殄




天物侍臣皆對曰善 上曰爾等歲祿有限日費無窮倘或過度侵牟剝削皆原于此須體朕懷與共寶之

已卯 皇次孫允炆生 東宮妃出

癸未瓜哇國王八達那巴入貢

征西將軍衛國公鄧愈卒愈虹縣人自盱眙率所部從于滁  
州累戰得大功封以征西將軍討吐蕃沈毅詳敏有所委不  
憚危苦功成不矜敬禮朝士尤性敦孝友年四十有一卒于  
壽春喪至 上躬自臨奠擇葬于城南之西山追封寧河王  
謚武靖嗣改申國公銘西安衛指揮僉事

陶望齡曰衛國公恭謹奉法事親至孝與下有惠可謂士  
君子之質行矣當王業始創專閫受賑軍旅四駕以愈才  
武又 上所最信愛然未嘗一當大敵所至輒留鎮撫豈  
戰守之任各有當與誠不足托于上勇不足威敵仁不足  
柔邇或可使進取難與守也然則鄧愈之烈豈不偉哉  
袁表曰寧河王之勲大矣哉方陳方諒之順流而東下也  
卷土合圍氣吞豫章頓兵堅城之下者三月之久其鋒銳  
亦少挫矣卒之漂血康郎僵屍彭蠡一發而殪雖 高皇  
帝之神武然固守以待王師扼其咽喉使友諒進退失據






者皆出于寧河王之功也作鎮八州威嚴以敵愾恩信以  
撫人禮下賢士雖古之名將何以加諸

王世貞曰寧河王之初以敵戰深入名亡幾而建方面勛  
最多而不甚偉然汗馬者几無寧歲矣詹爵上公帶礪六  
王而以天死不獲終享其奉或謂高皇帝末功臣鮮自  
保者得天為幸是不然以愈之忠順勤勞雖為畢萬可也  
吳曰寧河王之卒猶在強年乃其東蕩西滌鎮撫八  
州其聲色已奕奕在諸將之上今襄陽人猶道之朱夢爰  
稱寧河王事母孝撫弟愛匪獨將略之雄兼有君子之行

十二以故太祖心重之光輔帝業作我世臣有以也夫

丁亥冬至日始合祀天地于奉天殿祝文曰曩遵古制分祀  
天地周旋九年于心未安誠以父母天地覆載生成之德一  
也及嚴奉禋祀別異南北人子事親曷敢異處竊惟典禮其  
分祀者禮之文也合祀者禮之情也自今春首合祀于南郊  
永為定禮

已丑夜月食  
甲辰夜歲星犯房  
是月免河南陝西廣東湖廣今年災傷田租



江夏侯周德興有罪當下獄特赦之召諭將相大臣曰昔廖永忠犯罪屢宥不悛又復僭侈朕甚惜焉朕祭祀之時一心奏格及遣爾輩輒多私利慢神國家宮室之外未嘗築一臺榭汝輩私取材木自廣結構念昔相從皆赦不治夫法度者所以一天下也為功臣誣之再三難矣智人君子既守法又以訓子孫是以爵位傳于無窮御史大夫丁玉為平羗將軍討四川威茂等二酋董貼里諭新除有司官  
十二月乙巳朔日食

丙午命諸司啟事東宮者二三大臣叅決奏之

丁未錄殉事及病故諸功臣子孫丁忠等五百十有一人各授指揮千戶百有差

戊戌置神宮監內使掌太廟中洒掃陳設之事


庚戌內使金吉為圓邱署令洪文杜慶為司香奉御


辛亥真臘國王莽荅甘武者特達志來朝呈表貢方物

丙辰陽曲縣地震

甲子夜白虹貫月

戊辰威州土酋董貼里來降置威州守禦千戶所





是月各道按察使司來朝諭以風憲各盡乃職

高麗入賀明年正旦 上諭中書省曰彼王顥被弑奸臣竊

命貢使五年宜遣人問嗣安在如政出嗣王當依前王歲

貢馬千匹明年貢黃金百斤銀萬金良馬百細布萬匹仍還

我遠人否則弑賊奸詐將構于邊氓也

國權

益官設遷孺木撰

戊午洪武十一年

正月甲戌朔封 皇子椿 蜀王柏 湘王桂 豫王楨 漢王植 衛王

改封吳王楠 周王

已卯中山侯湯和進封信國公誥曰爾和雖舊將惟守昆陵

于忠有欠念相從之久泯前過論功令復念東平越南下閩


西擒察罕腦免首長下巴蜀頗有其功特加授信國公祿三

千石世襲

國權

洪武十一年

一



羅鶴曰湯信公雖云世世祿二十八年湯公薨其世子昂

署前軍都督僉事早卒嫡孫晟且長終太祖之世不令

襲爵宣猶不忘毘陵時意耶

壬午 皇子梅生

甲申置黃平守禦千戶所

丁亥雨大冰

己丑置江陰守禦千戶所

是月安南陳煇弟煇遣使來告哀命中使陳能予祭

徵天下承宣布政使司及各知府來朝

二月辛亥太陰犯井

丙辰勅中書省減淮浙鹽價俾商輸粟西河梅川給餉

浚漳沱河 壬戌熒惑犯五諸侯 此條在己未徙故元臣之下

己未徙故元臣二十五人部衆千九百人于陝西平涼府

癸亥 不皇太子祀 皇陵右丞相汪廣洋從

東平侯韓政卒政睢州人以元義兵長來歸授江淮行省平

章攻下張士誠將李濟于濠穴城攻安豐獲忻都敗竹貞平

淮東西山東出師河北剗平堅寨得封 上臨其喪贈鄆國

子英散騎舍人

甲子考功監丞郭傳署湖廣布政使右叅政

辛未遣覈海康遂溪潮惠免其田租

是月置茂州衛時四川都司脩灌縣橋至天陶關汶州土酋  
孟道貴疑沮之指揮胡重勝等分田石泉灌口進蠻伏山崖  
投石不能進乃間道潛出兩山後聲炮蠻駭遁連敗走之士  
酋楊者七降詔置衛仍命平羗將軍御史大夫丁玉率兵往  
征松潘

三月癸酉朔暹羅斛國入貢

甲戌翰林應奉永寧荅祿與權致仕

元河南北道  
廉訪司僉事

丁丑河間知府楊翼安等考績來朝分三等稱職無過者賜  
坐宴有過稱職者宴不坐有過不稱職者不預宴立于門宴  
者出乃退


已卯夜文星自天津流五丈餘没

庚辰皇太子自祭皇陵畢還京

壬午秦王櫟晉王榘之國燕王周王楚王齊王還駐鳳陽

命禮部定各官奏式

丁亥命庶官有才能者不次擢之西安知府李煥文寶鈔提  
舉費震俱擢戶部侍郎餘量遷九十五人



已丑太子正字桂彥良為晉王右傅燕府長史朱復為左相

禮部員外郎朱孟爰為侍郎

都督僉事王誠陳桓為浙江都指揮使

辛卯征四川茶蠻洞俘五百十六人悉宥之

甲午熒惑犯積屍氣

丁酉始作牙牌給朝臣

庚子置莊浪分衛于碾北

是月遼東火

廣西梧州知府望江周樂世致仕樂世有善政歸自衣衾外

惟書一篋

四月乙巳寧夏地震城摧

戊申歲星犯鍵閉

己酉閩婆國王麼那陀喃入貢

禮部侍郎朱夢爰為尚書夢爰博學有文稽古定制預焉

兵部尚書陳銘為吏部尚書

甲寅定賞軍節錢例以期給


丙辰興化衛指揮使張赫為大都督府僉事

戊午永嘉侯朱亮祖言江南之安東沐陽二縣有野鬼數百

國權

洪武十一年

四



夜持炬 上製文遣祭

置四川寧川衛

丁卯戶部尚書沈立本免侍郎費震為尚書員外郎王瑒為侍郎侍郎李煥文為兵部尚書

辛未置山東寧海州寧海衛

是月建立皇陵碑記以儒臣多文飾自作文直述微物艱難勒之元嗣君愛猷識理達臘殂于和林謚昭宗子脫古

思帖木兒立

設遷曰元嗣君初在儲貳膺監撫之寄逞其私臆猜擴廓

而奪其兵柄最計之失也中原盡棄流離漠北雖屢侵屢

敗而俘不為突厥臣不為呼韓終世長朔野不享不庭亦

餘氣所分臘矣國史輒稱其入寇彼故元之東宮也今日

之事楚人得之楚人失之乃云寇哉

改太原護衛為中太原中護衛

籍鳳陽屯田者為軍補貴州衛

慶陽靈州屯田百戶山丹等叛陝西都指揮使葉昇討平之


俘二千六百五十餘人

五月壬申朔 皇子權生

國權

洪武十一年

五



五 癸酉命東宮文學傅藻等編脩春秋本末

丙子議定天下歲造軍器甲冑等一萬三千四百六十有五  
騎卒刀二萬一千把弓三萬五千一百矢一百七十二萬

高麗琉球二國入貢

庚辰遼東地震有聲

癸未下沙木洞蠻叛湖廣官軍討平之

甲申置府軍衛

丙戌日食

丁酉免蘇松嘉湖逋租六十五萬二千八百二十八石

留守衛改留守中衛

戊戌免永年等縣夏稅

己亥羽林左衛指揮使張銓武德衛指揮使孫恪留守衛指

揮謝熊興化衛指揮同知張德俱為大都督撫府僉事遼陽

都指揮馬雲為遼陽行大都督府僉事各增賜公田千石

庚子賑聞喜萬泉饑民

宥廣東左右叅政劉益康濟罪當徙 上念其以監生侍諸

王也


應天府尹武昌劉仁卒予祭葬

元四川行省右丞降

國權

洪武十一年

六





胡人侵陝西歸德州之三岔口官軍擊敗之

燕府左傅邱廣卒廣安徽定遠縣人初冒嚴姓從渡江累有  
功歷官都督府僉事追侯昌樂侯謚景成

六月戊申改黎州長官司苟得為安撫使

己酉兵部尚書李煥文改戶部吏部侍郎王瑒改兵部吏部  
尚書陳銘為大都督府掌判官

壬子遣使祭元嗣君曰當宋末造中原豪傑故非一人君祖  
宗起沙漠而遂有之及君父子垂衣何期矢馬朕托身緇  
流又何期得之天也嗚呼曩者因君與羣臣之固志是用鄰

好不脩我不敢多使比聞君長往念昔元孫安忍不吊行人  
致奠唯靈如在

壬戌夜熒惑犯右執法


丙寅置燕山中左二衛

丁卯夜寧夏衛風雨兇牟旗槩有火光

己巳五開洞蠻吳奮兇作亂靖州衛指揮僉事過興死之命  
辰州衛指揮楊仲名往討平之

七月丁丑賑猗氏等縣旱饑戶粟一石免夏稅

戊寅前戶部侍郎沈立本署刑部侍郎



己卯寧夏大雨地震

辛巳西平侯沐英城岷州置岷州衛碾北衛

癸巳置寧山衛

辛卯西安旱蠲其租

癸巳 皇孫 高熾 生燕王出嫡長子

甲申歲星犯斗 此條在癸未置寧山衛之下

丁酉禁謫戍人不得上封事

己亥命光祿少卿徐英以茶紙衣服往罕東市馬四百六十九匹

遣廣東布政司趙亨堅詔諭故元丞相驢兒于應昌

是月蘇州松江台州揚州海水溢賑被災者

八月丙午歲星犯房

戊申前刑部侍郎顧禮為戶部侍郎

置鳳陽中右二衛

甲寅高郵獻白兔

乙卯陝西華亭縣大雨雹傷稼免今年田租


己巳工部侍郎朱瑛為尚書

是月詔曰興王之亂肇福天下惟思民之勞先朕率兵渡江

國權

洪武十一年

八



姑孰金陵京畿宣城廣德徽州長興安吉宜興江陰相次版

圖六州四縣久勞于前朕不忘于我子孫今年秋糧盡免

遣使詔諭金山元將納哈出

九月庚午朔御奉天殿頒歷

癸酉冊寧國公主

丁丑太白犯氐

戊寅成都華陽地震

吉安侯陸仲亨  
汝南侯梅思祖赴召逾期收陸仲亨公田奪梅思祖俸

甲申置黔江守禦千戶所

丙戌勅李善長等曰卿等董大祀殿工有日矣其善撫梓人

速成之來日實朕父母劬勞之辰勿以此事離重役

丁亥置遵化衛 是夜太陰犯天街

己丑客星掃天井西南行至十月己未陰雲不見


壬辰山西太原地震

丙申追封劉繼祖義惠侯婦婁氏夫人繼祖濠之太平鄉人

元總管致仕好施子捐地葬 仁祖馬

設遷曰劉繼祖之德比麥飯苳粥鉅矣誠不可忘然首倡

義旗肇開大業則滁陽王尤萬世之功也進而推之雖血



亂無傳求其支屬爵以列侯予茅土祠春秋不為溢矣

置府軍左右二衛

是月永寧衛落下池賊作亂官軍討平之

中都國子助教崇德貝瓊致仕瓊元貢士博學知名

復遣祭元嗣君

十月戊申遣內臣吳誠詣總兵官指揮楊仲名行營觀方略

設遷曰此內臣監國之始即不預軍事恐為所怵也

庚戌駙馬都尉曹國公李貞薨貞盱眙人徙臨淮東鄉上

姊字之性醇謹宴見不以時每駕行輒令守宮者屢幸其第

宴懼甚貞表謝曰臣生長田疇勿勤稼穡惟知食力何望顯

榮初年特蒙仁祖皇祖帝不以臣之庸愚俾居子婿之列

久在侍下報之罔極繼而中原兵起室家無存獨携幼子避

難他方跡寄于豺狼之區奔走于荆棘之地命危朝露豈意


生全幸遇聖明待以肺腑緬思往時之艱苦豈意今日之榮

華尺寸絲毫莫非帝力年七十六進封隴西王謚恭獻葬于

盱眙縣之靈跡鄉

乙卯梅殷為駙馬都尉尚寧國公主

丙辰蘭陽河決傷稼溺人畜免田租



戊午驍騎左衛改府軍後衛 夜太陰犯南斗

辛酉占城國入貢

武德衛改府軍前衛

癸亥前戶部侍郎程昭為寧國知府

甲子興武衛改武德衛 是月大祀殿成

歸元平章完者不花于故元丞相驢兒

原丞相部屬

十二月庚午朔寧國知府涂節為通政使

置寧化守禦千戶所

靖樂縣

五開洞蠻平命內臣尚履奉御呂王勞指揮楊仲名閱勝

西平侯沐英為征西將軍率都督僉事藍玉王弼征西蕃

甲戌占城入貢

戊寅封邳河溢免今年田租

皇孫允熲生

癸未置太原左護衛 是夜月食

乙酉陝西華亭縣旱蝗免田租

庚寅 皇太子妃常氏薨


壬辰臨江侯陳德卒德鳳陽縣人從渡江累有功封贈杞國

公謚定襄

國權

洪武十一年

十一



是月蘇州知府李亨在官勤廉民甚愛之憂去賜米鈔有勅  
曰卿守制朕未嘗忘也恐艱日給特賜家用服滿來朝

十二月辛丑太白犯壘壁陣

除蘇州松江杭州嘉興湖州五府魚課

復置興武衛

癸卯署刑部侍郎沈立奉為尚書

丁彭亨國王麻哈刺惹谷饒百花國王刺丁刺者望沙入貢

辛亥暹羅斛國王入貢

甲寅致仕翰林學士承旨宋濂來朝

乙卯衍聖公孔希學來朝

丙辰吏部尚書李煥文為四川左丞政

戊午金吾前衛改羽林左衛

是月僧宗泐等使西域

勅賜廣西承宣布政使司諸城城哲米六十石鈔二十五定

儒士仍闕服來朝自是凡官丁憂去者皆賜有差

遣高麗使還責其挾詐殺使之罪


詔諭故元丞相哈刺章蠻子驢兒納哈出等曰元末多事群

臣有棄自全有託朝命自擅目擊非一卿等獨仗義衛主

國權

洪武十一年

十三



深寨有始有終矣聞欲立新君其親王有三皆嫡派母抑尊  
而扶卑若有賢愚之別從賢則吉夫當流離之際臣能竭力  
不絕元祀豈不難哉或置尊卑賢愚勿論但立君為名自專  
生殺非人臣之道况彼此疑猜卿等富貴如飛霜深可慮也

國權

鹽官設遷孺木著

乙未洪武十二年

正月辛未 燕王周王楚王齊王自鳳陽來朝

乙亥罷天下監運司批驗所三十二


已卯合祀天地于南郊大祀殿奉 仁祖配先齋三日風和

日暖夜升壇澄霽尤甚 上大悅令儒臣紀之

太常寺志曰邱文莊云漢儒六天之說既有昊天上帝又

有天皇大帝又有太乙感生帝之類皆非正禮也本朝惟

國權 洪武十二年



國家圖書館, NATIONAL CENTRAL LIBRARY, TAIWAN, R.O.C.

大祀殿祀昊天上帝九所謂天皇太乙五大帝之類一切  
革去三代以上祀典之正所僅見也又曰 聖祖合祀天  
地于南郊之門壇而加屋焉則是秦壇明堂為一制也  
列聖相承皆以一太祖太宗配是郊祀宗祀為一體也其  
所義起者與

庚寅 太陰犯井

甲申征西將軍沐英移兵洮州十八族叛蠻

丁亥詹州倉副使李德言天下有司例滿九年而兩廣瘴厲  
乞減一考從之于是雖兩廣非瘴厲者仍九年汀漳郴贛龍

南安遠亦瘴厲通叙

定丞相御史大夫等官歲祿之數

辛卯永嘉縣地震


戶部員外郎任柳為侍郎通政使涂節為御史中丞

甲午復置陝西行都指揮使司于莊浪

乙未命守制官在任三年無贓犯者月如俸級予半級在任

三年如品級予全俸三月養其廉著為令

設遷曰 聖祖持嚴贓吏而祿及倚廬所以勸廉至詳且  
渥也不知自何時廢矣惜哉





丙申始許國子生歸省賜衣鈔

平羗將軍御史大夫丁玉平松州叛酋

二月戊戌朔曹國公李文忠往河州岷州臨洮鞏昌梅州措置

城守邊事

乙巳給天下孤老鈔助薪炭又京民孤幼戶給鹽十五斤孤

寡戶十斤

初昏有大赤星自天市東垣流游氣中沒昧爽有星自紫微

上輔流至文昌沒

戊申作神樂觀

己酉定遣使外國儀注

辛亥召前丹徒知縣濟南李思迪于閩中俾訓國子生思迪

元進士國子助教洪武初授起居注歷山西行省叅政貶丹

徒坐失入人罪安置閩中 上嘉其守召之


壬子定公主郡縣主歲祿之數

丁巳命山東登州牧渡海遺骸罪舟人棄者

己未羽林衛軍進白兔

癸亥勅李文忠曰二月二十五日大知軍入西番勝負必決

矣符至爾即從洮州城取道而出朕嘗有密諭當遵而行 鉄



事須速成山西之軍還衛洮州擇人守焉

甲子夜有星自上台流并宿五小星隨沒

丙寅信國公湯和率吉安侯陸仲亨江夏侯周德興宜春侯

黃彬鞏昌侯郭子興練兵臨清

征西將軍沐英等兵至洮州追擊其十八族酋長吐蕃川藏

皆降遂置洮州衛指揮聶緯陳暉等守之

三月戊辰戶部尚書費震為湖廣布政使侍郎顧禮為尚書

初昏太陰犯辰宿

辛未暴風

勅平羌將軍丁玉曰三月三日捷至松州已克徐將資糧于

容州進取潘州若盡三州之地則疊州不窮兵自服凡降酋

必遣入朝朕親諭之

壬申置亳州護衛


給軍士布縷自製戰襖從山西布政司華克勤之言通行各

邊知照

江西布政司叅政劉璉下獄以誠意伯基子特宥之

丙子國子司業樂韶鳳為國子祭酒

戊寅暴風



壬子梅陽人朱得原作亂潮州衛指揮崔延討平之

初昏太白犯昴

乙酉山東萊州知府董俊為兵部尚書明州知府余文昇為

工部尚書平陽知府徐鐸為應天府尹

丁亥曹國公李文忠言泲州艱運勅曰羗既斥若棄之不

守數年後將患邊慮小費生大患非計也今所獲牛羊分給

將士亦足二年食阿卜商瘦瘠子必縛送之

己丑皇子梗生

乙未上朝退坐便殿召儒臣論治道國子學官李思迪馬

懿獨然上謫之勅國子師生曰師也者模範其志竭胸中

有發世之良能不隱而訓昔仲尼入周廟閱三緘于西階所

戒妄言者也如其法莫何嘗禁拘國子學正李思迪馬懿朕

日召同遊望時閑朕乃非有所問終日不語遣侍東宮亦復


如之或因旁言問及不過就他人言以對畢後未嘗效誠此

深其所學秘而務獨善者耶故勅師徒必達模範之所以

丙申勅李文忠沐英以所得馬悉送京師

勅曰朕給幼儒筆札令日講四書一章先儒古文一篇明日

皆來其先儒古文多以韓柳尋行數墨者有之粗知大意者



有之柳子厚之兄司牧邕州構亭馬退山巔斯逸樂也子厚  
不規乃咏亭美于民何利馬退山茅亭記文之無益也幼學  
亦以將至空逾日月此其可不戒哉

四月甲辰眉縣人彭普貴作亂殺知縣顏師聖勅四川都指揮  
音亮等捕之

戊申刑部尚書沈立本為江西承宣布政使司大都督府斷  
事官霍矩為刑部侍郎

庚戌皇子懋生  
光祿寺卿徐興祖致仕賜銀鈔仍祿之

夜濼州雨雹


丁巳置內府尚衣尚冠尚履三監針工皮作巾帽三局甲乙  
丙丁四庫改南珮局曰監

戊午召募浙人補校尉力士凡一千三百四十七人

庚申日交暈

遼東守將潘敬葉旺等言高麗致書饋 上戒以人臣無外  
交爾自今其慎之

乙丑勅李文忠沐英等曰四月庚申日交暈在秦分主戰鬥  
已未太白見東方順行而西：征大利宜順時追擊番寇



勅吏部曰朕思創業以來文武群臣宣力効勞皆天之賜今  
多年高宜令致仕樂其壽考秩居三品以上者仍舊四品以  
下各陞一等賜誥勅沂州判官李齊等泗水主簿陳禮等皆  
加官一等致仕賜勅

前湖廣左叅政無錫張燾為禮部員外郎

丙寅臨汾縣地震 是月置松州衛紹興衛

五月丁卯朔陽曲縣地震

庚午給工匠人等鈔悉遣還

丙子初昏有赤星自柳宿流至游氣中没

己卯定遠縣大雨雹傷麥

癸未免北平稅課

戊子青田縣大雨水壞民屋傷人畜


初昏夜有赤星自天厨没于螣蛇昧爽又星自建昌没

于女宿

已丑勅責四川都指揮使司音亮朱輔等淹師蔓寇不即擒  
滅爾罪何逃軍中惟有指揮茅貴勇略有功千戶瞿閏亦効  
力將士勤怠朕悉知之

庚寅勅李文忠分軍自棧道勦蜀寇

壬辰浙江嚴州大雨水漂廬舍傷人畜令免今年田稅



丁未日本國王良懷入貢

丙辰夜有大星自騰蛇有數小星隨之流至雲中沒

庚申江西袁州通判即墨隨斌為廣東按察使司斌元官入

朝授英山主簿討叛晉知縣穰虎暴又普通判政簡事治

辛酉夜有大星赤芒自六甲行至文昌沒

六月丁卯 上欲罷松州衛平羗將軍丁玉言其不可從之詔

玉還四川

都督僉事馬雲征大寧

壬申定 東宮與親王往來書式及相見之禮先 東宮書

日記諭答諸王書日記答諸王奉東宮書曰謹啟

四川華容縣大水

甲戌勅遼東守將潘敬葉旺等以高麗龍州鄭白等率男婦

來降切不可留春秋有云毋納逋逃不然邊患啟矣


夜太陰犯夜宿

丙子召安吉侯陸仲亨江夏侯周德興宜春侯黃彬還京

戊寅夜有赤星自壁宿行至羽林沒

庚辰設北平各門兵馬司

辛巳改黃州守禦千戶司為黃州衛



甲申賜元丞相驢免書丞相微有疾朕聞之深為憂特遣賫藥物其服之無疑

乙酉編春本末成

己丑江夏商水等縣大水

甲午夜有星自外屏行至近濁没

改廣西護衛為桂林左衛桂林左衛為桂林中衛

七月乙未朔附海國公吳禎等一百九十三人于功臣廟

丙申召曹國公李文忠還京

夜有大赤星自王良行入紫微上宰没

乙巳荊州故陳友諒舊校孫諒等謀逆捕斬之

胡人犯阿蘭溪口大同右衛指揮魏平擊敗之俘六百餘人

夜太陰犯建星又太白犯鬼宿

丙午有赤星自土司空至鉄鑽没


丁未裁河州府

庚戌河州衛千戶甯正為寧夏指揮僉事

甲寅陝西都指揮使葉昇留守右衛指揮仇成為大都督府

乙卯夜有赤色星自婁宿行至近濁没

丙辰平羌將軍御史大夫丁玉討四川眉縣盜彭普貴等平



之命罪都指揮音亮等如軍法

己未曹國公李文忠還京師提督大都督府事

庚申改瞿塘守禦千戶所為瞿塘衛隸湖廣都司

八月<sup>丁卯</sup>上御華蓋殿語侍臣曰人之害莫大于欲惟禮可以

制之先王制禮所以防欲也循禮可以寡過肆欲必至滅身

己巳吏部尚書陳煜卒命有司祭之予葬

辛未右丞相汪廣洋疾勅勞之

乙亥夜熒惑犯鬼宿

丙子改蘄州守禦千戶所為蘄州衛

丁丑置漢中嘉陵等七驛

陝西遣送番酋二十二人湖廣檻送盜蠻九十四人永寧蠻

婦二十七人戍海南遼東洞獠蠻婦分送孳牧所皆給糧

戊寅減案牘繁文元末案牘最繁冗專聽老吏恣奸吏至是


上厭之廷臣定其制

夜熒惑犯積屍氣

己卯昧爽有大赤星自文奎行至游氣中沒

庚辰延安侯唐勝宗督海運還京上邀東城堡兵餉之數

辛巳令致仕官鄉居宴會毋坐士庶下同官序爵著為令





壬子國子助教馬從龍告老以翰林待應奉致其任

癸未太常寺卿唐鐸憂去

乙酉發三千騎屯鞏昌臨洮防番寇

增廣東廣西要地巡檢司

丁亥勅宋國公馮勝曰命爾督建周王宮室茲聞將以九月

興工中原之民所恃二麥此其播種時勅到即放還之至是

九月乙未戶部尚書顧禮改刑部

丙申置山西廣昌守禦千戶所

己亥征西將軍沐英等擊敗西番三副使兵擒三副使瘞噍

子等殺獲數萬人獲馬二萬餘匹牛羊十餘萬班師

庚子刑部尚書顧禮卒禮江南蘇州府崑山縣人

癸卯福建興化府地震

通政司左叅議江夏方為為中書省左叅政禮部員外郎張

籌為刑部尚書

甲辰御史臺御史大夫丁玉為左御史大夫浙江承宣布政

使司安然為右御史大夫四川右丞政秦中為左御史中丞


四川重慶知府殷哲為中書省右叅政戶部侍郎任彬為尚

書安徽滁州知州魏鏗為禮部侍郎

國權

洪武十二年

上



乙河南都指揮使曹震為大都督府僉事兼四川都指揮使

丁未江南常州知府張度為吏部尚書

戊申置四川威州衛

己酉改安徽鳳陽行大都督府留守司為留守中衛置留守

左衛 丙辰置北平永寧衛及古北口守禦千戶所

戊午占城國遣使入貢中書省不即奏內臣出以聞勅責胡

惟庸汪廣洋等

龍岩人汪志賢作亂福建都指揮斬獲殆三千人餘悉遁海

壬戌閩縣地震

釋瓜哇使臣還國初瓜哇東番王勿陀勞網結西番王勿勞

波勿入貢意未恪留其使

罷四川梁山大竹二守禦千戶所

癸亥秦王櫛晉王櫛來朝


十月甲子朔大都督府僉事降陳方亮降海南衛指揮同知

辛未初昏有大星自女宿行至建星没

戊寅月食

己卯瓜哇國王八達那色那務入貢

征西將軍沐英等班師至京



辛巳有星自軒轅行至軫沒宿

甲申置太倉州鎮海衛

乙酉暹羅斛國入貢

海南衛濮英為陝西都指揮使

十丙戌福建興化府復地震

丁亥置浙江昌興守禦千戶所

召永嘉侯朱亮祖于廣東亮祖行事多不法番禺知縣

同以聞故召之

癸巳儒士吳況為翰林待制

十一月甲午朔上讀漢武帝紀語吳況曰人主理財當視國

如家父子而異貴家必隳矣君與民亦猶父子也損民益君

君獨富能乎哉

封大都督府僉事成仇為安慶侯藍玉為永昌侯謝成為永


平侯張龍為鳳翔侯吳復為安陸侯金朝興為宣德侯曹興

為懷遠侯葉昇為靖寧侯曹震為景川侯張溫為會寧侯周

武為雄武侯王弼為定遠侯俱食祿各予二千石世襲

儒士耿祿張經道為兵部員外郎吳玄高炳為工部員外郎

乙未夜有赤星自天苑行至外屏沒



已亥北平都指揮使郭英浙江都指揮使王誠陳桓陝西都  
指揮使濮英蕭成寧州衛指揮僉事高顯虎賁右衛指揮同  
知何德府軍衛指揮僉事張翼等並為大都督府僉事  
上御奉天殿朝訖語翰林待制吳沉曰進賢納諫最為人主  
要事曰第行者鮮之故亂多而治少上曰真知其賢興國  
何有不進真知其諫忠也何有不納惟知之不能真耳  
庚子雷

甲辰中書右叅政殷哲降通政司右通政  
壬子置鴈門關守禦千戶所

甲寅濟寧侯顧時卒于北平時臨淮人倜儻善戰從渡江累  
有大功封侯攻濠州從征張士誠戰昇山從北征世封拜征  
西左副將軍平西蜀又拜征左副將軍與李文忠分道出  
塞迷失道糧盡士疲不能戰時獨引數百人擊胡大敗之掠  
重振士年四十有六贈滕國公謚襄靖子敬嗣之


戊午刑部員外郎東平呂宗藝為尚書

元中書叅政降

庚申都督僉事馬雲平太寧寇

廣東清遠縣人房文廣作亂官兵往捕之

辛酉戶部員外郎張璉為侍郎通政司右叅政殷哲為中書



省左丞左叅議李素為右丞

兵部侍郎趙本為尚書吏部員外郎陸鎮為兵部侍郎

十二月癸亥朔故虎賁左衛指揮僉事李實贈大都督府僉事

予祭葬實從沐英征番戰死土門峽

甲子太陰犯井宿

丁丑東宮侍書張統翰林院脩撰逄原霖為通政司左右叅

議鳳陽府知事白志仁為戶部侍郎

戊辰前致仕翰林學士承旨宋濂來朝

庚辰衍聖公孔希學來朝

甲申平羌將軍御史大夫丁玉還自四川拜大都督府進左

左都督上戒其在軍少謀士又不得其心

庚寅監察御史夏俊伯為戶部侍郎

壬辰諭中書省選卜筮官夜熒惑犯軒轅大星

是月右丞相汪廣洋追殺之廣洋字朝宗江南高郵


貶海南

人乙未赴召留幕下歷省臣工書咏頗耽酒色怠事又憚胡

惟庸祗浮沉取容御史中丞涂節言惟庸毒誠意伯劉基死

上問廣洋諱之怒其欺詔貶次太平馳勅曰昔助文正江西

雖不能匡惡自當明其不然何深幽隱匿以致禍生前同楊



憲中書憲奸惡萬狀匿而不言觀爾之為君之利君之禍亦

視之如此肆侮法所難容特追斬其首級用示柔奸

談遷曰國史云廣洋得所賜書益懼遂自經夫使人用勅

從事安有坐視其投環者則史臣飾之也廣洋當天造草

昧短于相才宜早引退乃欲以容之福希不覲效嚴主不敗何待

開陝西西安府甜水渠李文忠引龍首渠水入城始甘飲

安南國王陳煇入貢上以安南剽占城國不已遂詔諭陳

煇曰書不云乎毋為亂首爾國與占城國構兵已十餘年朕

未覩是非所在然以社稷為博剽椎焚遺男女不得耕織朕

兼愛海外元甚憇之往者詔諭爾等使寢戈舒忿爾實不

奉詔陽解陰構毋乃首亂違書戒哉春秋列侯國亡慮百數

相繼迸滅此無它背君好戰二者已耳自今爾其鑒之

高麗署國事王禡貢黃金百斤朱提萬金以違約卻之

侍部侍郎西域伯顏之中飲鳩死子中寓江西舉歲試授廣


湖書院山長遷建昌教授及亂辟贛州路經歷歷分省都事

福建行省員外郎郎中以吏部侍郎持節發廣東兵閩救至

則廣東下變姓名為黃冠游行江湖間會事之遁還江西嘗

以鴆自隨至是聘下子中喏大泣曰死晚矣歌七章祭祖父

師友仰藥而死



王世貞曰嗟夫介哉伯顏子中也其間闕險阻躓而愈振  
何異廬陵信公異焉天下盡屬明分已定久子中亦幾  
無日哉處死矣詔至乃引從容仰鳩竟示不臣忠之時也  
而諸薦紳先生薄元上謂無所當狗嗚呼上不得君臣哉  
是歲除官二千九百八人儒士人才五百五十三人墾田二  
十七萬餘頃

國權

益官設遷孺木著


庚申洪武十三年

正月癸巳朔詔諭高麗貢不如約

甲午御史中丞進賢涂節告左丞相胡惟庸與御史大夫陳  
寧等謀逆上親臨鞫初惟庸得  
上意竊肆威福橫甚封  
事稍嫌匿不奏四方饋遺無算家人為奸利事道闕榜辱閩  
吏吏奏之  
上怒殺家人切責丞相謝不知乃已又以中書  
違慢數詰問所由惟庸懼乃計曰  
主上魚肉勲舊臣何有

國權


洪武十三年



我耶死等耳寧先發毋為人東死惟庸兄女妻李善長弟存  
義子祐相表裏為重其定遠故里第井中忽生石笋水溢數  
尺三世塚皆夜有光恠燭天而數以事見督遂誘吉安侯陸  
仲亨平涼侯費聚使出招士馬為外應間與存義謀始圖之  
善長驚曰爾言何為者寧欲族我耶居旬日惟庸復謂存義  
苟事成盡指淮西地王太師善長心動乃歎息起曰吾老矣  
惟爾等所為惟庸乃遣元臣封續致書漠北請兵又使指揮  
林賢通倭使俾載精兵千人偽貢及期會府中掩執善長上度  
可取取之不可則掠武庫兵入海惟庸因為第中甘露降

請上幸臨許之會西華門內使雲奇走告變上登城樓  
望其第藏兵甚衆即發羽林掩掠獄具


王世貞曰攷贈司禮監太監雲奇碑奇以內使守西華門  
時胡丞相居第距門甚邇而欲謀逆詭稱所居井湧醴泉  
邀上幸而伏甲以待奇偵知之亟走當蹕道勒上馬  
言狀勢鬱舌馱不能宣上恚甚左右搯筆亂下奇臂將  
折猶奮指逆臣第上悟登西皇城樓而眺顧見丞相第  
中壯士裹甲伏屏間數匝亟發禁兵捕擒之而後召奇氣  
絕矣詔贈奇內官監左少監而國史則謂惟庸以驕恣漸






露不自安而會故所居定遠里第井忽生石笋水湧起數尺三世塚火光燭光天遂為瑞有非分之覲右丞相汪廣洋以巽懦不能持正外謫益自疑而其子嘗走馬衢道中誤踐人死上怒欲抵償請納馬贖罪不許于是構李善長諸將陸仲亨費聚御史大夫陳寧中丞涂節同謀逆節恐事露奏發之尚書商嵩時謫為省吏亦發之上臨鞠皆驗惟庸與寧歿死史之紀茲事詳矣第不及醴泉出要上臨而伏甲謀為逆也雲奇發惟庸逆謀功甚大而史逸之且又以府第醴泉溢為故里第石笋發井涌起數尺何

牴牾若此第上既登城樓覩伏甲掩捕之得反狀矣又何假于涂節之告變也豈節以事發始首故不免于死耶戊戌誅左丞相定遠胡惟庸御史大夫茶陵陳寧夷三族盡誅其僚黨九萬五千人以涂節不早告亦棄于市惟庸初事上為元帥府奏差轉宣使丁酉授寧國主簿晉知縣吉安通判歷湖廣按察使司僉事漸大用陳寧元末鎮江小吏來金陵代軍帥草奏稱旨因薦用通經有治才嘗守蘇州燒鉄烙人肌入拜御史大夫益嚴酷雖詔責不改子孟麟數諫寧怒立杖之死上怒其不情寧懼遂同逆惟庸誅後指揮林賢



以倭兵四百餘人與僧如珪來獻巨燭中藏火藥兵器事泄  
磔林賢倭兵悉成雲南降詔切責日本國云  
設遷曰胡丞相猥才竊柄睥睨名器見于雲奇之走訴則  
已伏甲據涂節猶在謀議間大抵雲奇為不妄也第英  
主龍興手剪群雄如灶工掃除事且大定而逆黨不數人  
藏甲不數百覬專諸于窟室冀聶政于東社自非嬰孺其  
敢任之或曰惟庸非叛也素作威福牀于汪廣洋之斬首  
積疑成獄既斧鉞不少貸而緩李善長陸仲亨費聚何也  
可以知其故矣

群臣言胡惟庸任寧國知縣賂太師李善長黃金五百得媾  
躡拜太常少卿惟庸在相多不法懼上英明欲反以玉具劍  
奉善長善長遣奴操兵四十人從待日舉事李善長為國首  
輔負大恩當斬 上召李善長坐與食語舊事甚悉雪涕顧  
群臣曰吾初見太師長吾十四歲而謀計多合不棄累功至  
窮顯吾女女太師子謝諸臣為我曲宥太師請誅吉安侯陸  
仲亨 上曰仲亨年十七父母兄弟俱亡以一升麥藏于草  
間朕見而呼之曰來遂從朕長育以功封侯此吾微時股肱  
腹心其勿問并宥平涼侯費聚已前死遂止誅存義并赦祐



已矣諭朝臣欲罷中書省任六部監察御史許士廉請設三公府太師太傅太保以總百僚庶務上然之  
庚子山西左丞政傑斯為吏部尚書河南按察使鄭九成為禮部尚書前北平按察副使劉崧為禮部尚書應天府尹徐鐸為戶部尚書

作蘇州太倉鎮海三衛海船共一百六十六艘轉運

癸卯詔罷中書省進六部尚書正二品侍郎三品改大都督府為五軍都督府分理事務詔天下自是奸臣貪吏益嚴誅責


王世貞曰六部彷彿周官之舊獨戶部兼冢宰制國用之

職而宗伯兼司徒掌邦教之職耳繁簡劑量頗亦得宜秋官之外復設都察院大理寺夏官之外復設中軍都督府雖兵刑為重亦後世不得已之意要之不如古者令大密文太繁兵民之途太分而已

武官子弟常安等一百三十人為參將舍人

常遇春之姪

乙巳上御奉天門命吏部選官以北平山西陝西河南四川之人用于浙江江西湖廣直隸之人用于北平山東山西陝西河南四川廣東廣西福建之人用于山東山西陝西河南四川考覆不稱及降謫者不分南北悉于廣東廣西福建



汀州江西龍南安遠湖廣彬州之地遷用以示勸懲

置江南邳州衛

丙午定五軍都督秩正一品

裁浙江湖州守禦千戶所

丁未罷鉄甲弓箭毛皮織染神帛等局

罷軍需庫置軍器局罷龍江分司置龍江提舉司

戊申改雞籠山為雞鳴山

庚戌遣覈天下倉庫蓄積之數

丁卯御史大夫安然為左御史中丞

己未罷山西河南北平鳳陽等城兵馬司

庚申減湖廣靖州崇山二衛中益引價四之一

辛酉大都督府掌判官洪彝為吏部尚書

是月廣東右衛百戶建昌翁顯討山寇房文廣等力戰死之

贈都指揮僉事子儀襲湖廣都指揮僉事

二月壬戌朔詔有司舉聰明正直孝弟力田賢良方正文學及

術數之士


浙江嘉興知府薛祥為工部尚書

發丹符驗天下錢穀

國權

洪武十三年

六



詔安陸衛指揮僉事柳依率兵守漢中

勅諭天下巡檢司 是月城山東兗州

命文武各官年至六十以上者聽其致仕仍給誥勅

己巳夜有赤星自張宿流至雲中沒

辛未詔諭 皇太子諸王曰吾平日無優伶摯狎無酣歌夜

飲正宮無自縱之權嬪妃無寵幸之媚朝政稽衆衆決惟善

是從燕間之際一人之論尤加維審每星存而出日入而休

非疾勿惰以此自防猶恐不及與爾言之使知持身之道

壬申吏部尚書傑斯改禮部 是日暴風

故元 國公脫火赤樞密知院愛足率五萬餘衆屯和林

命西平侯沐英以陝西兵擊之

癸酉四川都勻定雲土官大金總等來歸

乙亥遣應天府官祀漢蔣子文晉卞壺南唐劉仁瞻宋曹彬


元福壽五廟

夜有赤星自游氣中流近濁没

丙子作潭王邸于長沙

泗城州知州岑善忠子振作亂寇利子廣西官軍討之

丁丑重定文武各官歲祿



辛巳太師李善長請老上所給儀仗二十戶許之

壬午命訪舉賢良方正孝弟力田文學之士八百六十餘人  
禮部給廩餼主事一人掌之

丙戌罷江陰守禦千戶所

已丑召故真人張正常子宇初詣闕嗣正一嗣教道合無為  
闡祖光範真人

辛卯詔十月朔進明年大統歷

三月壬辰朔減蘇松嘉湖賦額初 上惡吳民殉守張士誠故  
重其科時天下田租畝三升三合三勺蘇松等至七斗至升

額元三十六萬石張氏百萬石明歷減尚二百七十餘萬石

陸深曰 國初總計天下稅糧共二千九百四十三萬餘

浙江二百七十五萬二千餘蘇州二百八十萬九千餘松

江一百二十萬九千餘當天下九分之一蘇贏于浙以

一府視一省天下之最重也松半于蘇：一州七縣松才

兩縣較蘇之田四分處一則天下之尤重者惟吾松也

丙申鄧鎮嗣申國公


湖廣崇山衛指揮僉事楊仲名督軍屯田

戊戌裁戶部印引局

國權

洪武十三年

八



辛丑作魯王邸于山東兗州

壬寅燕王棣之國北平賜燕山中左右三護衛及卒五千七

百七十人吳僧道衍從

戊申定六部官制各子部四吏部曰總部司封司勳考功戶

部曰總部度支金部倉部禮部曰總部祠部繕部主客兵部

曰總部職方駕部庫部刑部曰總部都官比部司門工部曰

總部屯部虞部水部其郎中員外郎主事官多少各有差

庚戌琉球國入貢定吏員月俸

壬子西平侯沐英兵至靈州遣精騎偵知脫火赤兵次亦集

乃路遂踰賀蘭涉流沙七日夜至其境夜去營廬四十里啣

枚四其軍自當前圍擒得其全部以歸

定教官首領官雜職官三等

癸丑兩浙都轉鹽運使呂本言舊制鹽四百斤為一引官給

工本米一石准米價兼支錢鈔今驗鹽場地產分則永嘉等


二十場增益一千四百五十七引下砂等十一場增益萬七

千二百九十引許村等四場增益六千八百三十七引報可

乙卯定公侯稱號不稱散官稱開國輔運推誠宣力武臣某

丁巳罷南昌衛置袁州衛

國權 洪武十三年



四月乙丑禮部侍郎劉崧署吏部尚書

壬申諭翰林待制吳況降編脩工部侍郎清遠李鏞改兵部

癸酉翰林應奉陳溥致仕賜御製詩文

壬午工部員外郎周誼為侍郎

甲申都督濮英襲故元柳城王等于西涼破之獲部民千二

百餘人馬二千餘匹牛羊無筭

丁亥濮英請開哈梅里之路通商往來從之

戊子翰林編脩張美和致仕上製文賜之美和篤實善著

書理學類編八卷群書備考十二卷及元史節要行世年八十三

己丑諭群臣各舉所知以聞是月裁廣德州之廣洋縣

改封故楚國公廖永安為鄆國公豫章侯胡美為臨川侯

是月國子助教清江聶鉉致仕鉉辛亥進士適廣宗縣丞適

早蝗言民困詔免其租遷翰林待制改助教十八年分考禮


闈就廬陵教諭終其身

廖永忠之子權嗣德慶侯

五月辛卯朔復湖廣漢陽德安府隨州桂陽州孝感應城安陸

應山枝江沅江通道善化上津光化竹山等十五府州縣

都督僉事王簡卒簡安徽壽州人從渡江累有大功追封霍





山侯謚忠毅葬于鍾山子虎留守右衛都指揮使賜簡葬  
進各省都指揮使正二品布政使司從二品原正三品  
甲子雷震謹身殿

乙未詔曰朕以菲德托于萬姓之上不期宰輔設計肆奸擅  
致賢才陷罪朕思刑業之初念民生之不易首誅奸惡權  
根剪蔓及其餘黨錄刑之際不無過焉甚非上帝好生之德  
五月甲午時及申雷震謹身殿朕甚懼焉天下有罪自十惡  
外咸赦除之釋在京及中都屯作者免太平鎮江宣城廣德  
滁和等今年田租還山軍二萬四千餘人為民坐事免官者  
自思無罪則身來朝仍授官


丙申釋在京及臨濠屯作者

御史臺左中丞安然予告韓國公李善長理御史臺事  
戊戌禮部員外郎李冕為侍郎

己亥詔免天下今年田稅

工部侍郎 寧劉敏改刑部敏初中書吏織蘆席奉母或瞰  
亡遺青瓷器懸梁上俟後還之授楚府錄事時給沒官婦女  
敏獨不請故胡黨事與彼無預

庚子戶部主事王克已試吏部侍郎



壬寅都督濮英兵至白城獲故元平章忽都帖木兒進次赤斤站又獲故元幽王亦憐真及部屬一千四百人金印一  
癸卯命吏部銓次薦辟者皆授官秩各賜夏衣一襲諭曰爾朝廷失得有司利病必盡知之當盡心所事為朕福民

癸丑 皇子松生

戶部郎中范敏署尚書事

丙辰會寧侯張溫雄武侯周武往河南理軍務

勅遼東都指揮使曰五月二十五日知高麗周誼至遼東此必有詐前元庚申君索女其國誼女入元宮庚申出奔朕內

臣得此女歸今誼數至殊有意也卿等不可不備

勅浙江嘉興府教諭吳源以中書舍人林廷綱薦召之

己未松州大雨雹傷麥

是月署吏部尚書劉崧致仕


罷御史臺及各道按察使司

日本國王良懷入貢以無表不誠卻之

六月庚申朔免山西太原大同鹽課

許叙州重慶輸布代絹

癸亥南安陳煇入貢方物上表謝前諭



覈各省軍餉及官吏月俸

丙寅雷震奉天門 是月揚州倉火

丁卯勅江陰侯吳良臨川侯吳胡美都督張銓於顯孫恪以  
災異止山東湖廣各王邸工作

己巳復吳況翰林待制

庚午儒士趙楫試通政司右叅議

癸酉太常寺少卿仁和阮峻為吏部尚書

勅召儒士李延齡李翰以御史薦舉

甲戌陝西平涼府雨雹傷麥免田租

乙亥罷各府照磨

勅召儒士楊良卿王成季以翰林典籍戴安薦舉

丙子勅召儒士陝西石器荆至靈寶王道楊原張知閩鄉王  
仲寧張謙郭黼趙規以吏部尚書范敏舉薦


鄧元錫曰聞之 高皇帝以武功創業顧慕用耆儒見耆

儒輒喜以耆儒無誕讀可厚俗也至鷹擊豪猾剷除汚染  
率倚幹敏敢任之賢竭力才赴功然非久仆已故是時天

下儒多質行長厚無綺言曰春者蠢也春者物之始生

記

也國之始基運也如春嗚呼豈非天哉



召江南江都縣訓道胡志遠以御史給事中王和薦

丁丑置諫院官左司右諫各一員左右正言各一員

戊寅諭戶部軍民嫁娶喪祭之物如舟車絲布等皆勿稅

己卯置行人司行人一員左右行人各一員

壬午福建閩縣大風雨傷人淹稼免今年田租

癸未大風摧木

甲申復降吳況為翰林編脩

召儒士呂慎明及湖州教授童冀又儒士劉仲海鄒魯狂宋

季子俱各專勅儒士揭樞王與冀文達白天民遣召不勅俱吳況舉薦

置判錄司判錄一員秩正七品副判錄司二人秩從七品專

驗京官俸給罷天下抽分竹木場

禮部尚書僕斯致仕僕斯江南溧陽人元嘉定知州降

延安侯唐勝宗督浙江衛官作海船繕城郭


暹羅斛國入貢

是月上省災避正殿群臣表請正朝答曰朕弗克行仁乖

上帝后土之好生負海岳之呵護累祖宗于地下致五雷

奉命著跡殿廷雖不寧于此時恐忽忘于永久卿等請朝正

殿朕不違群情賴爾臣匡朕不違



玉田蘇恭讓為湖廣漢陽知府恭讓應薦授郡簡明嚴慎稱

治行第一

臣戒錄成回胡惟庸命儒臣纂古宗戚宦官悖逆二百十二人頒示天下

七月壬辰諭戶部運陝西布于近邊易米麥

詔京官復其家

癸巳罷秘書監悉歸翰林典籍

甲午太白晝見

遼東都指揮使潘敬葉狂送高麗貢使周誼至京上以高

麗國貢不如約留周誼遣其通事官先還禁彼使毋擅入

乙未廣東海康縣大風雨壞官署民舍

辛丑罷寶鈔提舉司及外都布鹽運使司照磨

壬寅復封鄭遇春榮陽侯置廣東新興千戶所

廖昇為淮安衛指揮僉事


廖永安之從子

是月倭寇廣東東莞縣

甲辰許給事中弋留張純求歸娶上嘉張純素行謹厚遣

賜鈔其家致之以婦至

廣東都指揮使王真卒真安徽壽州人以元千戶降累戰得



功從征浙江福建鎮粵七年賜葬于鍾山已贈前軍都督同知追封臨沂侯謚恒義

戊申召儒士林克堅林有學林益高益思淵

壬子韓國公李善長等請賀聖節不許又請制曰父母劬勞昊天罔極當生之日痛心無已所以奉祀靜居無敢歌懽卿等數云天下太平及朕年高固請稱賀今不違群情毋致過侈自是在外諸司五品以上官聽其上表進賀明年為始

夜有大星自河鼓流雲中沒

丙辰兩廣溪峒人官京師者悉聽還鄉

平章潘原明往福建理軍務

丁巳禮部侍郎李冕試尚書

八月庚申 皇子橫生

辛酉置壽州廬州儀真等衛


癸酉徵賢良方正楊遇春等至京師楊春乞歸許之

丙子祭歷代功臣用常服行禮 是月山西陽曲縣地震

戊寅罷松州衛

己卯置翰林院檢閱官

丙戌太白犯心



置應天府學設教授一人訓導四人

倭復寇海豐 是月給天下儒學諸生廩膳

九月庚寅永嘉侯朱亮祖卒亮祖江南六合縣人本元末義兵

元帥擒于寧國釋之戍浙東取溫台由海道從征廣東廣西

至海南封以征右副將軍助平蜀杖死軍校不與賞鎮廣

東時多不法徵還番禺知縣河間道同奏其事 上責數之

亮祖不服死于杖下 上憐之賜葬江寧縣之安德鄉手撰

壙志不諱 寶錄云以亮祖功臣不下吏  
但罷職今居江寧之安德鄉

辛卯景川侯曹震榮陽侯楊璟永城侯薛顯等屯田北平

甲午日本國遣使入貢以無表不誠卻之

乙未夜有大星自壁宿流至離宮有三星隨之沒

命天下文武諸司正官及首領官來朝明年正旦

戊戌改行人判錄司為司正左右行人判錄副為左右司副


己亥徵儒士王本等至京勅諭之曰朕興艱難朝無良佐道

乖政靡勿獲泰安四凶雖誅而賢士未至今得爾諸儒旬有

餘日厥志未知特爾勅問果志秉忠誠可交神明與朕同游

以康天下

辛丑召山西太原府學訓導王觀陽曲縣訓導李德彰



癸卯夜月食

乙巳萬壽節 上御奉天殿受朝賀宴群臣謹身殿歲為常

占城國入貢

丙午始置四輔官兼太子賓客告太廟 王本安邑杜祐

貴溪龔敷為春官壺闕社敷趙氏望莆田吳源為夏官秋冬

官兼攝

丁未詔戒守令曰曩奸臣弄權百職罔忠遂致刑典所授有

司皆出編氓宜知稼穡艱難民生疾苦舊任未逮者若仍前

非則國有常憲

戊申勅四輔官王本等曰卿等躬受斯任民生繫焉可不重

慎乎卿等昨為庶民今輔朕掌茲二儀故事不可有乖

己酉夜河州地震

庚戌改北平大興右衛為燕山右護衛


辛亥後軍都督僉事高顯卒顯安徽巢縣人從渡江隨征戰

累有功賜葬于鍾山封汝陽侯謚安武肅

癸酉福建南靖縣大風雨

是月詔陝西衛軍以三分之一屯田

召儒士梁俯賈維岳等以御史 薦舉





十月戊午朔勅四輔官王本等曰是春徂秋天災疊見惟秋之  
暮天氣尚暄諭爾齋沐精勤爾等奉命盡誠候及立冬朔風  
釀寒以成冬令嗚呼感應如響古者三公四輔論道經邦理  
陰陽順四時乖戾則曰失職卿等尚竭忠勤用佐厥終  
諭吏部有司舉士非人者罰無貸

召儒士張叔廉陳真宋訥教諭石瓊楊盤訓導曹文壽張斌  
李睿等

壬戌罷諸王府錄事官增置左右長史二人秩正五品  
江南高郵大水淹稼傷人免田租

乙丑前戶部尚書徐鐸試湖廣右布政司

丁卯置廣西平樂千戶所


己巳真臘國王叅荅甘武者持達志入貢

召魏國公徐達還京

己亥致仕兵部尚書單安仁奏言江南淮安運道事停之  
己卯試禮部尚書李冕為江西布政使司

乙酉汰天下各縣巡簡司非要地者共三百五十四

福建都轉運使司副使龍泉周時中坐罪當棄市宥之除名  
是月吏部引見國子生二十四人命授守令面諭以撫民事



君之道皆俯首叩謝

十一月戊子罷在京行用庫

癸巳擢教諭石礪為戶部侍郎

乙未魏國公徐達還自北平

庚子重定王國社稷山川壇制

甲辰江南崇明縣潮決溺人畜免田租

丙午故元平章完者不花與朵兒不花率數千騎入桃林口

犯永平指揮劉廣迎擊之蔡家庄兵少被殺千戶王輅畏創

以後軍邀歸路又戰于燕河敗之又伏發擒完者不花劉廣

子榮官城門尉至是襲廣職

戊申河州梁州地震

己酉莊浪地震

庚戌進四川夔州為府綿眉葭橫等縣進為州睢陽縣改睢


州復安徽來安全椒舍山等縣

癸丑吏部重定功臣及常選官封贈等第

丙辰儒士宋訥為國子助教

十二月戊午令春月海運免風雨覆溺之患

己巳夜廣州大雷雨



壬申江南太倉衛指揮使朱文質福州左衛指揮僉事陳文  
俱為後軍都督僉事

甲戌福州廣州地震

丁丑夜河州地震

庚寅湖廣試布政司李叔正試禮部侍郎

癸未改天下佐貳雜職官方印為條記

乙酉江西南昌知府<sup>某</sup>上賀正旦表不如制宜罪宥之

是月承勅郎曾儀等乞歸者勅曰朕聞士有五患焉患同庶  
人不同庶人矣患無學矣患不齒于志學者齒于志學者

矣患無官矣患不忠矣患不孝儀等以生負選入國學  
異庶人矣未及數年授以官出國學者矣今各言歸云者親  
云歸祭亦知孝身惟志學忠君未審何若患不出于志學  
而忠君則當思孟子三鼎五鼎之厚薄也民之享也無鼎乃  
微士之享也有鼎乃貴有厚薄以三五鼎者則必思志學  
而忠君矣

重作天禧寺<sup>舊長干寺</sup>


詔諭日本國王

南雄侯趙庸鎮守廣東

國權

洪武十三年

三十一



國權

辛酉洪武十四年

正月戊子故元章孫兒不花等犯邊命魏國公徐達為征

平

大將軍信國公湯和穎川侯傅友德為左右副將軍率諸將

討之

改湖南岳州為府

戶部試尚書范敏免

命新任官各舉文學賢良方正聰明正直孝弟力田才幹士


國權

洪武十四年

一

國家圖書館, NATIONAL CENTRAL LIBRARY, TAIWAN, R.O.C.

藍官設遷孺木著



己丑涼州地震

乙未置松潘等處安撫司龍州知州薛文勝為安撫使

庚子戶部郎中徐輝試左侍郎

壬寅置各省布政使司左右叅議

甲辰夜太陰犯角

乙巳國子助教趙新為山西承宣布政使司

命吏部凡郡縣所舉諸科賢才日引至端門廡下令四輔官

諫院官共論議覘其才識

壬子白虹貫日 是月罷天下造兵器

癸丑諭勲武臣子弟皆入國學受業

丙辰詔求賢曰哲士幽潛而閔世天道動忍以增能士隱耕

釣困羈旅高才至智不能伸者有司以禮敦致朕將尊顯之

禮部侍郎靖安李叔正為尚書


是月命天下編賦役黃冊

命刑部錄囚具案奉旨送四輔官諫院官給事中覆覈奏之

有疑讞四輔官封駁著為令

四輔官龔敏杜敏趙民望吳源並致仕以安然為四輔官兼

太子賓客



二月己未改澠州為縣

壬辰賜諫院右司諫石中判錄司左司副夏守忠鈔各十定以公直敢言故也

甲子浙江浦江鄭湜為福建承宣布政使司左叅議時許湜兄弟通胡惟庸吏逮之爭入獄事聞于朝宥之錄用湜

乙丑融縣徭民作亂官軍討平之夜太陰犯井

丙寅楚王楨之國武昌

暹羅斛國遣使入貢  
辛未試戶部侍郎武進徐輝為試尚書

癸酉更定徒罪煎鹽炒鈇例

乙亥儒士鄭孔麟王德常為河南廣東等處右叅政

丁丑申明鄉飲酒禮

己卯增各省左布政使右布政使


庚寅覈實天下官田

改浙江明州為寧波府

甲申詔令武官三品以上有犯請旨乃鞫四品以下竟逮問

乙酉至壬午至是日中黑

三月丙戌朔詔六部及有司曰唐虞三代刑措不用朕夙夜究



心未臻斯效良由委任非人其大赦天下與之更始

丁亥復置各道按察使司及分司

己丑江南蘇州人附私物運船上以運木勞苦赦之

庚寅詔刑部犯流徒罪者毋處以荒地定道里之遠近居之

以全其生

癸巳夜太陰暈入太微垣

甲午置廣東高州廉州守禦千戶所

乙未定王國慶賀禮

丙申勅內外倉庫司局官各舉賢良方正文學才幹之士

勅致仕刑部尚書李敬為國子祭酒禮部侍郎劉崧為司業

己亥福建莆田平陽等縣地震 夜月食

辛丑頒九經于北方學校

宋國公馮勝為征 將軍節制河南等處息民練士


癸卯勅刑部官吏受賄者必求所賂人併罪家徙邊著為令

丙午召前御史中丞安然為四輔官

署兵部員外郎劉述為試侍郎

丁未置東宮左右春坊司直郎二秩正六品

戊申軍倉副使李忠權為刑部侍郎



命天下郡縣訪明經風儒補訓導

辛亥起致仕四輔官龔敷為國子學司業勅曰某為朕一來  
坐以教道無奔趨筋力之勞而有成就後學之美亦儒

者素志也

壬子涼州地震

癸丑工部主事李文仲為侍郎

四月丙辰朔改國子學于雞鳴山之南

令國子生兼讀劉向說苑及律令諭國子祭酒李敬曰劉向  
說苑多載言前往行朕時觀省深有勸戒律令乃國家法制參  
酌古今可遠刑辟宜兼讀

簡精騎一萬六千三百三十五人赴北平從大將軍征胡

己未國子司業禮部侍郎劉崧卒崧字高子江西泰和縣人

元貢士洪武三年授兵部郎中遷北平按察副使清苦自持坐事


免胡人敗起禮部侍郎署吏部尚書致仕起司業年卒一

上自作祭文祝之崧博學有志行所著有北平八府志東游  
錄嶺南錄職方集文集等各若干卷行世士人咸欽佩之

袁表曰劉子高之清近世所未有也其權吏部尚書也不

逾月而免功業不際見惜哉今之世得如劉子高者以司

銓貪濁之風或少衰矣乎





壬戌夜歲星犯壘壁陣

癸亥昏刺太陰暈五帝座

甲子 上諭刑部諸臣曰惡名為人所耻仕者孰不欲保爵祿彰善譽或差或誤雖悔無及自今犯者宥罪復職榜過門端改則除之

戊辰儒士吉安伍朝賓為諫院左正言

庚午大將軍徐達出塞右副將軍傅友德至北黃河敵聞風懼遁輕騎夜襲灰山克之獲人馬牛羊輜重無算西平侯沐英等略山寨獲全寧四部以歸

夜有大星自北斗魁流至游氣中沒

癸酉召前武昌知府義烏傅藻為河南按察使

藻博學詞章

乙亥置浙江定海守禦千戶所 又復置磨勘司

己卯北斗布政使司乞仍徵焰硝 上以已息兵罷其輸


癸未罷廣東海北鹽課司

甲申改廣東陽山縣為連州尋復置陽山縣隸之

五月乙酉朔哈梅里回 阿老丁來朝

翰林待制吳沉進千家姓

丁亥復廣東廉州為府化縣欽縣為州又置茂名合浦等縣



庚寅裁鄧州之穰縣

辛卯復施州

乙巳太陰暈歲星

甲辰前翰林學士承旨宋濂卒濂字景濂浙江金華府浦江縣人少師吳萊即名文薦授翰林編修辭歸上復聘入拜江南儒學提舉改起居注歷文學侍從之職最被眷注嘗歌醉學士歌既致仕歲一朝孫慎坐通胡惟庸誅并怒濂欲死之皇后以東宮師力救乃安置茂州至夔州宿僧舍嘆曰佛書報應以類何爽也夕自經年七十三竟葬夔後蜀王

遷葬華陽縣濂篤倫品寡嗜慾內外誠恕日不釋書所著潛

溪集蘿山集龍門子浦江人物志翰苑集芝園集行世

朱國禎曰先生篤行真脩學有本源文歸爾雅遭際聖神

大弘制作守先王之道而見之行無道學之名而有其實


收宋儒未竟之功開我明大成之運決當從祀孔廟而

先生既不自名世亦無有名之者汶至今良可嘆息也

太祖勞其身以憂天下切齒于人之不仕者御製班班可

考先生二十餘年魚水之交躬鞠盡瘁死而後已自其職

分末年引疾實拂聖心若有意避遠并子孫亦杜仕籍





癸丑山西布政使司趙新為翰林脩撰

甲寅改湖廣平陽守禦千戶所為桂陽守禦千戶所

是月五溪洞蠻作亂江夏侯周德興請行 上老之未許德

興請益力勅遣之曰忠武之臣盡智力筋力禦災捍禦身終

乃已朕史書見之常歎羨之焉溪蠻為盜方命壯帥卿時侍

旁即願請征不覺興嘆豈古有今無朕閔卿年邁卿復固請

凱旋之日賜田一庄嗚呼勤忠不怠非卿者誰

靖州蠻作亂衛兵討平之

六月丙辰朔選國子生三十七人教習

安南國王陳煒入貢時思明府言安南脫峒二縣攻其永平

等寨安南亦訴思明見攻 上以煒欺詐卻之

戊辰置施州衛

壬申夜有星自招搖流雲中沒


戊寅築浙西海塘工成

癸未置黔江縣 是夜辰星熒惑太白聚于東井

七月乙酉重定進賀表箋禮

丁亥刑部郎中錢塘胡禎為尚書

戊戌日本國遣使入貢卻之令禮部移書責國王良懷



裁工部雜作局

己亥左軍都督僉事何德卒德河南光州人從起兵累得功  
年五十二賜祭葬贈左軍都督同知追封廬江侯謚壯毅

壬寅前刑部員外郎寇徵為應天府尹

癸卯置密雲衛

丁未定文武散官之制

己酉前軍都軍府經歷商英試刑部侍郎

臨洮雨雹傷稼溺人畜令有司賑粟

壬子各省社稷山川等祀武職武不預

夜有大星自天津流三丈餘數小星隨之至紫微右樞沒

八月癸丑朔諭征雲南梁王把匝剌瓦爾密先備資裝

壬戌進四川重慶州為府

癸亥夜白虹見


乙丑南雄侯趙庸平廣東陽春縣蠻命誅首惡悉餘宥之

丁卯前致仕戶部侍郎李仁為滁陽牧監正 李仁唐州人

廣安州人偽彌勒佛煽惑民衆官軍捕斬之

庚辰河南河決原武祥符中年 上令護舊堤毋重困民

四輔官兼太子賓客安然卒然柘城人元山東行省左丞降



從渡江征戰屢見功年五十八上自作祭之

辛巳置廣東南海衛

大將軍徐達等班師還京

九月壬午朔穎川侯傅友德為征南將軍永昌侯藍玉西平王

沐英為左右副將軍率步騎兵卒三十萬征雲南梁王

賤龍江曰朕不能親然嘗覽輿圖詢彼地豪傑而得其扼

塞進取當自永寧先遣驍將別將一軍向烏撒大軍繼自辰

沅入普定分據要害乃進兵曲靖彼所必守下曲靖三將軍

以一軍趨烏撒應永寧之師大軍直擣雲南彼此牽制破之

必矣下雲南大理必次下餘郡邑部落可撫而有也

勅播州宣慰使楊鑑南征

魏國公徐達鎮北平是月山西陽曲縣地震

癸未改翰林院欽天監太醫院正五品翰林學士一侍講學


士侍讀學士各二五經博士五典籍侍書各二待詔六史官

脩撰三編脩檢討各四

西域僧古麻辣室哩山丹室哩等辭歸先自中印度來朝命

游五臺山六年留京至是賜而遣之

甲申五色雲見置北平山海衛



乙酉置湖廣寧州衛

己丑復置起居注官

壬辰立滁陽王廟于滁州令有司歲祭

丙申置復州衛

丁酉置中都留守司駙馬都尉黃琛為留守司

己亥改蔣山興周禪寺為靈谷寺

辛丑勅刑部尚書胡禎等曰唐虞之世罪疑惟輕四凶之誅

止于流竄有司既不能宣明教化使民于無犯及有小過或

加苛刺朕甚閔焉自今十惡真犯決如律餘皆減死論

是月衍聖公孔希學卒

甲辰白氣貫日

乙巳夜有大星自八穀至四輔沒又赤星自婁至壁

丙午上謂四輔臣王本等曰天之于君猶父之于子有警


敢不懼朕與卿等皆當謹慎毋違

四川水盡源通塔平散毛諸峒長官叛江夏侯周德興討之

禁各省有司薦舉教官

丁未考功監令李激為兵部尚書

己酉翰林脩撰樂清趙新致仕予勅



以李翰何顯周為四輔官兼太子賓客

十月壬子朔日食

癸丑命刑部法司論囚奏聞從翰林給事中乃春坊正字院  
司直郎會議平允奏決

甲寅免應天太平廣德鎮江寧國今年田租官田半之

丙寅福建南靖縣民亂南雄侯趙庸討平之

秦府右長史奉化蔣子仁為山西按察使西

庚申古田民亂主簿蘇璉等討平之

辛酉給事中鄭因相言國初之制九啟事東宮官屬稱臣朝

臣則否蓋尊無二上今繫稱臣于禮未安下廷議編修吳沉

等奏曰東宮國之大本繼聖體而承天德者也臣子之敬無

異凡啟事東宮稱臣如故從之

壬戌置各省水馬驛二十有六

癸亥陽曲地震

遣監御史林愿孫榮等分按各道罪囚重者送京師從大

察

理寺詳讞


甲子改鳳陽右衛為河南左護衛

己巳禁瀕海軍民私通外夷

國權

洪武十四年

十三





壬申曉辰星見東方 是月定考功法

甲戌江西按察使司吏訐副使某常服寫表以妄訐正其罪  
丙子夜熒惑犯太微星

己卯衢溫處三郡盜起延安侯唐勝宗都督僉事張德討之  
廣東海陽民縣作亂南雄侯趙庸討平之擒一千餘人

是月周王楠之國河南

瓜哇國王八達那巴那務入貢

工部尚書薛祥坐事杖死祥素仁厚其不能直禍蓋數然與  
十一月甲申吉安侯陸仲亨鎮四川成都

乙酉黑氣亘天

戊子 上聞盜掠黃陂而兩勅宋國公馮勝于汝寧南陽伺  
其出沒捕之

庚寅覈天下廢寺田入官


甲午夜太陰犯填星

乙未大星自上台流至軒轅沒

丙申河南神武衛改河南右衛

己亥置大理寺審刑司左右審刑正六品左右詳議正七品

甲辰諭吏部兵部擇用志學武臣子弟



乙巳浚江南揚州官河

蘓人上治安六策 上曰治國當用賢致治在得人此首言用法誤矣

丙午南雄侯趙庸平程鄉縣盜

丁未賜國子生冬至節錢

平涼侯費聚兵趨雲南普定

江陰侯吳良卒良安徽鳳陽府定遠縣人從克滁和二州渡江拜指揮使要遮江陰為 既封平右江諸峒蠻五年十八

贈中軍右都督追封江國公謚襄烈賜葬鍾山之陰子高嗣

何喬遠曰 高皇帝始取天下虞漢吳相結使吳良守江

陰耿炳文守長興先以剪漢羽翼漢滅然後併力向吳亦惟二臣稱任使當時論者謂二人善守之日吳已亡矣逆


黨肅清榜示勲臣儼于徐鄧可謂鑒在上心者乎

起復太常寺卿唐鐸為兵部尚書

已酉禁有司不得差遣學官

庚戌福安民作亂官軍討之遁入山中適延安侯唐勝宗征處州盜兵分捕滅之

廣州海盜曹真掠東莞南海翁源等縣南雄侯趙庸以一萬



五千人分擊走之擒賊二萬餘斬五千有奇

十二月壬子禮部郎中高信試尚書張子源試侍郎張宗德試

兵部侍郎

中軍都督僉事孫世卒世安徽巢縣人從渡江敢戰有功贈

都督追封富春侯謚忠勇

乙卯福建龍岩人作亂官軍討平之

僧宗泐還自西域俄力思軍民元帥府巴者萬戶府從入朝貢

丁巳常德多虎噬人命留守司選勇士一百八十二人從回

回唐哈散捕之唐哈散善捕虎

命翰林院編修檢討典籍左春坊右司直郎正字考駁諸司

奏啟

戊午歐陽倫為駙馬都尉尚安慶公主

辛酉征南將軍穎川侯傅友德等率大軍至湖廣遣別將郭


英陳桓胡海等以兵五萬趨烏撒自與藍玉沐英由辰州沅

州趨貴州進攻普定普安皆下之留兵戍守趨曲靖

癸亥復置四川納溪益馬司

乙丑左正言田友信試戶部右侍郎

勅遼東都指揮使潘敬等高麗李仁弒主今願聽約束其貢



有一物不如約即卻之母被其誑


戊辰傅友德等至曲靖梁王把匝刺瓦爾密遣司徒平章達里麻將精兵十餘萬拒戰白石江右副將軍西平侯沐英請諸軍嚴陣兼道蒙霧潛渡白石江下流出其後而達里麻陣動大軍遂畢濟乘而擊之勁戰自旦至暮敵大潰擒達里麻俘以萬計克曲靖分遣左右副將軍藍玉沐英趨雲南自率衆數萬循格孤山而南搗烏撒元樞密院副使燕帖木敗歸妻脫、懷氏閉門不納曰爾受梁王恩惠兵敗不死何以見妻遂飲鴆死乃鴆其二男一女命侍兒曰我死爾焚其屋毋辱我言遂飲鴆死

庚午元梁王把匝刺瓦爾密聞兵敗與左丞相達的叅政金驢遁入羅佐山

辛未賜國子生明年正旦元宵節錢

勅傅友德等烏蒙烏撒果降否恐蠻地無糧令將軍分軍回衛今資糧于敵軍不可回也遣內臣勅烏蒙烏撒東川芒部建昌諸酋長如悔罪來朝否則遣貢朕當罷兵以安黎庶戶部尚書徐輝有事下獄論死 上以其勤減死論

壬申梁王把匝刺瓦爾密走普寧州忽納若驅妻子赴滇池



死夜同達的金驢遞自經草舍

癸酉沐英藍玉至雲南之板橋元右丞觀音保等出降明日

進金馬山梁王內臣也先帖木兒上金寶我師入城撫定吏

民自克雲南至出數師往九百日

設遷曰元社久墟雲南獨險遺兵分據者十四年自謂遠

限隔天地不享不庭及天戈西指複嶺重箐忽焉土崩滇

池不足飲我馬矣梁王雖怯有死無二亦朔末之錚者

未可以訖運置之也

丙子延安侯唐勝宗平蠻溫處山盜斬二百八十級俘三千

三百餘人賜田一庄及都督僉事張德

征南左副將軍永昌侯藍玉遣景川侯曹震定遠侯王弼宣

德侯金朝興分兵趨臨安諸路

戊寅金朝興至江川元右丞五輔臺降


是月甘露降鍾山

城普定烏撒初傅友德搗烏撒元右丞實卜遁去頃復合友

德故止戰以觀士士無不思死友德下令曰我軍深入有進


無退彼遁而合必不一心併力與戰破之必矣吾故以觀汝


曹汝曹果可用也遂大破實卜軍拔烏撒城之得七星關以




國家圖書館, NATIONAL CENTRAL LIBRARY, TAIWAN, R.O.C.


通畢節進克可渡河東川土官左丞勝石及烏蒙芒部諸蠻  
皆望風降越州土官龍海降而後叛擊斬之  
太常寺卿呂本卒本安徽壽州人其女即 皇太子妃  
裁京畿都轉運司






國家圖書館, NATIONAL CENTRAL LIBRARY, TAIWAN, R.O.C.






國家圖書館, NATIONAL CENTRAL LIBRARY, TAIWAN, R.O.C.











國家圖書館, NATIONAL CENTRAL LIBRARY, TAIWAN, R.O.C.

